

مسرحية

موت مفاجئ

تأليف

هاني مهران

المكان : غرفة داخل مستشفى

الزمان : الحالى

الشخصية : دكتور فؤاد (طبيب وجراح)

المنظر

غرفة داخل مستشفى _ بها كرسي قديم بجواره ترابيزة صغيرة عليها أدوات مختلفة
_ سرير كشف _ برافان قديم فى الخلفية _ سلة مهملات

_ يجلس الطبيب مرتديا ملابس الجراحة معلق الكمامة على رقبتة ويرتدى جوائتى
طبى

_ يهتز من الخوف والغضب

صوت المايكرفون : دكتور فؤاد سرعة التوجه للطوارئ .. دكتور فؤاد سرعة
التوجه للطوارئ .. شكرا

_ يقف فى قلق وبيده مشرط جراح .. يتجه ناحية الباب ثم يعود مرة أخرى .. فى
حيرة .. يكرر ذلك

ثم يعود لسرير الكشف وينام عليه

(موسيقى مع تغيير إضاءة)

_ بعد لحظات

صوت المايكرفون : دكتور فؤاد سرعة التوجه للطوارئ .. دكتور فؤاد سرعة
التوجه للطوارئ .. شكرا

_ ينهض ويجلس .. يأخذ نفس عميق ويهز قدميه

_ ينهض وينزع الجوائتى من يده ويرميه فى سلة المهملات

_ يعود للكرسى ويخلع الكمامة وينفخ فى غضب

الطبيب : (بإصرار) مش هتحرك من هنا ..

(لحظة صمت)

الطبيب : خلى الناس تعرف قيمتنا .. عشان يبقوا يعلوا صوتهم علينا ويتخانقوا معانا

(لحظات صمت)

صوت المايكرفون : الرجاء من دكتور فؤاد سرعة التوجه للطوارئ للأهمية ..

الرجاء من دكتور فؤاد سرعة التوجه للطوارئ للأهمية

_ أثناء النداء يرن هاتفه المحمول بموسيقى حديثة

_ يمسك بالموبايل وينظر للاسم ثم يتركه جانبا ..

_ التليفون يبدأ فى الرن مرة أخرى .. يمسك التليفون فى غضب ويفتح المكالمة

الطبيب : (فى التليفون) : فيه إيه؟! الدنيا ماطاريتش .. عيل صغير ولا كبير مش

هتفرق .. ما إحنا بيطلع ميتين أبونا وفى الآخر أهاليهم بيمسكوا فينا ويحملونا

المسئولية .. شوفى دكتور حسام طيب .. أنا مرهق ومش هقدر أشتغل دلوقت

... كلميه فى التليفون زى ما بتكلمينى شوفيه وصل فىن .. المفروض كان يوصل

من نص ساعة .. أنا تعبان

.. أرجوكى .. أنا مش قادر أتكلم .. وماتخليهمش يندهوا عليا تانى .. قوليلهم هو

خلص ورديته ومش هيتحرك .. سلام

_ يغلق الهاتف ويتحرك ليخلع البالطو ويرميه على البارافان

_ يجلس ويتأمل حالته حيث كان غاضبا جدا (فترة صمت)

الطبيب : دلوقت محتاجينى .. ومن شوية كانوا بيشتمونى .. و و ... وو ...

يضربونى .. لما دكتور يتضرب لمجرد خطأ أى حد ممكن يخطأه .. بعد كل اللى

عملته وأنقذته من الموت وعملته 6 عمليات .. يتخانقوا معايا لمجرد بتر إيد

مالحقتهاش .. هو المفروض أعمل إيه ؟ أى حد يدخل لازم يطلع سليم 100 % ..

هو أنا إله

_ يرن جرس التليفون _ ينظر فى الشاشة ثم لا يرد

الطبيب : مش وقته يا ليلي .. كدة كدة هرجع البيت فى ميعادى

_ الباب يخبط من الخارج _

صوت من الخارج : دكتور فؤاد .. دكتور فؤاد .. أرجوك رد عليا

الطبيب : ياريت يا دكتور حسام تستلم ورديتك أنا شوية وماشى

_ جرس التليفون يرن _

صوت من الخارج : فيه حالة طفل وقع من بيتهم ومحتاج أكثر من عملية .. وأهله فى حالة انهيار تام

الطبيب : أنا مش مستعد أتهان وأتضرب تانى ..

صوت من الخارج : يا دكتور الطفل لازم يدخل العمليات حالا .. وانت عارف ان فيه حالات انت الوحيد اللى بتقدر تعملها بكفاءة

الطبيب : (يراجع نفسه _ ينهض) أنا قدامى 10 دقائق وأكون جاهز

(جرس التليفون يرن _ ينظر للهاتف ويتركه)

الطبيب : مش هعرف أرد عليكى فى الحالة دى .. يدوب الحق ألبس وأتحرك عشان العمليات

_ يتحرك ويرتدى البالطو والكمامة _ ثم يأخذ جوائتى من أحد العلب الموجودة بجوار الكرسي على التراييزة الصغيرة

المايكرفون : دكتور فؤاد سرعة التوجه لغرفة العمليات .. دكتور فؤاد سرعة التوجه لغرفة العمليات .. شكرا

الطبيب : (يمسك رأسه) الصوت ده بقى يعصبنى جدا .. (يصرخ فى الخارج) .. أنا جاي .. ماحدش يستعجلنى

_ جرس التليفون يرن _ مع خبط على الباب

الطبيب : (فى الهاتف بغضب) .. فيه إيه يا ليلي .. مش قلت ما تتصليش طول ما أنا فى وردية ..

صوت ليلي فى التليفون مقاطعة (تبكى) : معاذ وقع من البلكونة .. وأنا دلوقت قدام أوضة العمليات وبيدوروا عليك .. والدكتور اللى كان معاه سابه ونزل

الصوت من الخارج (دكتور حسام) : يا دكتور فؤاد .. الطفل مات يا دكتور ..
الطفل مات

صوت ليلي في التليفون : (تصرخ) .. إلحقتي يا فؤاد .. معاذ مات .. معاذ مات
_ الطبيب يترك التليفون في الأرض _ يتوقف للحظات في حالة بكاء مفاجئ _
يجلس على الكرسي يخلع الجوانتي ويرميه على الأرض _ يخلع الكمامة ويرميها
وينظر لهم في صمت

الطبيب : (في بكاء) .. آآآآآ .. آآآآآ ..

_ نسمع أصوات ومواقف بينه وبين ابنه .. ينتبه لها وكأنه في حلم

_ صوت ضحك ابنه

صوت الطبيب : تعالى هنا .. تعالى في حضن بابا (يضحك ويضحك ابنه)

_ صوت الطبيب : لو ماكلتش الأكل ده مش هتكبر وأصاحبك هيكبروا وانت لأ ...

صوت الطبيب : قول طبق طبقنا طبق في طبق طبقكم ...

صوت الابن : طبق طبقنا طبق (يضحكان)

صوت الطبيب : (بغضب) انت إيه اللي عملته ده .. كدة غلط (بكاء ابنه) ..

خلاص خلاص خلاص .. تعالى تعالى .. هجيبلك العربية اللي بتنور ..

(يلعب مع ابنه خلاويص)

صوت الطبيب : خلاويص

صوت الابن : لسة

صوت الطبيب : (يغنى) واحد هو ربي .. اتنين بابا وماما .. ثلاثة هما أخواتي ..

أربعة هما اصحابي

_ الصوت يتردد أكثر من مرة مع تكرار جملة :

(واحد هو ربي أكثر من مرة بشكل واضح)

_ يفوق الطبيب للحظة .. وينطقها بشكل واقعي

الطبيب : (بهدوء وانتباه) .. واحد هو ربى

(يجلس على الأرض من شدة بكاءه .. يرفع يده للدعاء)

الطبيب : يارب .. أنا مش عارف أتنفس .. النفس بقى زى حجر ثقيل مرمى فوق صدرى .. بتعذب مع كل ذكرى بينى وبينه .. حاسس إنى عجّزت .. الزمن فعلا مالوش أمان .. أنا حاسس إنى بردان أوى .. وده إحساس عمرى ما حسيته وإبنى موجود .. مابقتش مطمئن .. عندى شك فى كل حاجة .. حاسس إن كل شئ بقى سراب .. حاسس إنى لو بصيت للمراية مش هلاقى نفسى .. إبنى كان حلم .. والحلم مات خلاص .. يارب ارحمنى .. ارحمنى يارب ..

أنا عارف إنى مقصر معاك .. بس كان غصب عنى .. الشغل كان واخد كل وقتى .. ماكنتش عارف أعمل إيه .. إدتنى نعمة إنى أقدر أنقذ روح إنسان .. ليه حرمتنى من إنقاذ إبنى .. أنا السبب فى موت إبنى .. ومافيش عقاب أكثر من كدة .. ليه يارب .. ليه ؟! (يبكى)

_ ينهض بقلق ويتجه إلى الترابيزة الصغيرة يبحث فى الأشياء الموجودة ويرميها على الأرض حتى يجد مشرط جراح

_ يمسك بالمشرط ثم يقف للحظات .. فى قلق .. يتجه ناحية الباب ثم يعود مرة أخرى .. فى حيرة .. يكرر ذلك
ثم يعود لسرير الكشف وينام عليه .. وهى نفس حركة بداية العرض بعد النداء عليه فى المايكرفون

_ (موسيقى مع تغيير إضاءة)

_ صوت المايكرفون بصدى بسيط

صوت المايكرفون : دكتور فؤاد سرعة التوجه للطوارئ .. دكتور فؤاد سرعة التوجه للطوارئ .. شكرا

_ صوت المايكرفون بشكل واضح

صوت المايكرفون : دكتور فؤاد سرعة التوجه للطوارئ .. دكتور فؤاد سرعة التوجه للطوارئ .. شكرا

_ ينهض ويتفقد الحجرة فنجد أن كل شئ كما هو بشكل منظم وأن ما حدث كان خيال

خط على الباب من الخارج

الصوت : دكتور فؤاد .. محتاجينك فى العمليات

الطبيب : حاضر .. أنا جاي

_ يهم بالخروج من الحجرة فى حماس .. تنسحب الإضاءة

إِظلام

تمت بحمد الله

للتواصل

المؤلف

هانى عبدالرحمن مهران عبدالحميد

(هانى مهران)

كاتب ومخرج مسرحى

شاعر عامية

للتواصل :

Hany_mahran@hotmail.com

www.facebook.com/hany.mahran.7

ت / 01228951987 / 01116206053